

## Ўвлиг белнәр тосджана

Яшкульск района „Лиман-ный“ совхозин хөбнә 3-ч номертә фермин управляющ ұр Улашкин Петр Васильевич иигдж келв:

—Ўвдән кергтә өвсәрн мана хөбнә ферм бүклдән тетгдв. 3275 тонн өвсн белдгдв. Фермин 12 отарт 10000 гар торгън нооста хөн бәәнә. Октябрь сарин 10-н күртл хөн үвлзх кошармудур 2345 тонн өвсн зөбгдв.

Хө үвләр хургълулхин төлә гурвн отар, эс-гидж 2150 торгън нооста хөбнд көг тәвгдв. Эн чинртә көдлмшиг бидн райондан түрүн болдж төгсгвдн.

Ўвләр гарсн хургъдиг бүрндн хадгълхин төлә кегч оln хөбчнрин социалистическ дөрлдәнд орлицдж, мана фермин хөбчнр эврә күч-чидләрн 3 дулан хаша тосхв. Хөд үвлзх газрмудар бәәсн дулан хаша-хаац болн кошармуд цуг ясгддж, дулалгдв. Хө өмүллгън чигн цагтан, бүклдән кегдв.

Хәләвр сән болсн учрар, фермин цуг хөбдин чинән дундан болн дундинәс өбдән. Ах хөбч, коммунист ұр Очиров Бада авсн даалгъвран күцәдж, 100 хөн болгънас 125 хургъ авч, менд өсгдж,

экәсн салгъв. Чинртә сән көдлмшәрн ұр Очиров Б. районн Күндлягънә доскд орулгдв. 1958 джил эн Москвагъур селәнә эдл-ахун гәәхүлд одхд темдгдв.

Ах хөбчнр коммунистнр Полодаев Николай болн Мацаков Николай көдлмшин сән үлгүр үзүлдж, Москван селәнә эдл-ахун гәәхүлд орлицхала. Ах хөбч Чуджаев Василий чигн эн гәәхүлд 1957 джил одв. Мана күндтә хөбчнр иим үзмджтә көдлмш кеджәцхәнә.

Мана фермин хөбчнр цугъар бәәх дулан гермүдтә, күн болгън саалин үкртә, цуг бийнә фермин хөбчнрт 25 саадг үкр бәәнә. Намрин киитн эклсн учрар, хөбчнрт деер үмсдг дулан хувцн болн госн өггдв. Эврә хот-хооларн чигн хөбчнр тетгддж, дуту уга болв.

Алдр Октябрьск социалистическ революцин 40-ч джилн өөниг үзмджтә көдлмшәрн тосхин төлә, хөбнә дулан хаша-хаацин тосхлтд болн үвлзнъгүр өвс зөблгънд чинр улм икар өгч, үвлин белдвр чанъгәадж, цуг хөбчнр шундж көдлджәцхәнә.

А. УНГАРЛИНОВ.